

Der der vnterste ist vnter den andern Planeten / so habe der Arzt oder *Astralogus* eben acht / was im 7. *Saturnus*, oder *Mars* im 9. vbelß dreyen / vnd ob sie auch schädlich mögen seyn / oder vermilddert werden / etwa durch freundliche *aspects* anderer guten Planeten / vnd nach dem auffenthelt er den Menschen / biß an sein natürlich Ende.

XIII.

Allwege sol der Arzt erkundigen des Menschen *diet*, das ist seinen täglichen Gebrauch in essen / trincken / schlaffen / waschen. Darnach die Geburtsstunde / vnd am letzten richt er auff die Figur seiner Geburt. Aus der Figur er lerne der Planeten Stand / wie sie gegen einander in den Häusern stehen / Item vrsachen der Kranckheit suchen / vnd den Herren der Geburt. Vnd aus gegen geschicklichkeiten der Zeichen Rath finden / wie er dem Krancken helffen möge. Von dem weiter hernach.

XIV.

Vnter den Tagen sol man des siebenden nach der Geburt in acht nehmen / denn aus deren vrtheilen etliche das Leben oder den Todt. Da seynd auch etliche Tage so von den Alten *Critici* genant / wie etlich mal gedacht / zum Vnterricht nim ein Exempel von dem siebenden Tage. Wenn einer vngefehr krank wird / wenn der Mon ist im Wieder / ist ein heiß trucken Zeichen / vnd nach seiner Art artet sich auch die Kranckheit. Da sol der Arzt diesen Krancken trösten / seine Kranckheit werde sich endern am siebenden Tage / in deme der Mon aus dem Wieder geht in den Krebs (es were denn / daß der Krancke wütig vnd vnfinnig were) vnd weil der Krebs kalt vnd feucht / vnd eines vierdten *Aspects* ist